













54175/B


- 1) VERZASCHA, B
- 2) LANGE, C.
- 3) MANFREDI, P
- 4) BORRO, G.F.











(100)

4347604

FRANCISCI JOSEPHI
BURRHI

EPISTOLÆ DUÆ

- I. De Cerebri ortu & Ufu Medico.
II. De Artificio oculorum humores
restituendi.

Ad
TH. BARTHOLINUM.

ephi Cajetani Phil. Flaviani Fil. Viri Florent. Medici. Spathensis.



HAFNIÆ, prostant apud DANIELEM PAULLI
S. R. M. Bibliopolam, Anno 1669.

AUGUSTISSIME REX

DN. FRIDERICE
TERTIE

DOMINE CLEMENTISSIME.



DEDICATIO.



Regniis Tuis auspiciis in publicum prodire debuerunt Epistolæ tanto Autore dignæ. Inter Reges enim T. M. eminet, ille inter Philosophos. Placuit Majestati Tuæ regiis beneficiis illum Naturæ interpretem fovere: Illi quoque stat sententia, huic soli calamus mentemque dedicare. Ego vero, qui omnia quoque T. M. debeo, officii mei esse putavi, ex clementissima Maj. Tuæ voluntate, orbi erudito non invidere Summi per orbem Philosophi experimenta, ut etiam hinc universis constet, aureum, Te

DEDICATIO.

imperante, curiosis Naturæ Myſtis, ſeculum vigere. Minima ſunt hæc quidem; ſancto tamen Majeſtatis Tuæ nutu ſe audent inter magna efferre, donec ad majora prodenda generoſus BURRHI animus excitetur. Nam, quanquam nec parva M. T. deceant, nec vilia Philoſophum; in minoribus tamen clementiam exſeres, ille ingenium, ego in omnibus obſeqvium.

Sacr. Maj. T.

Subjectiſſimus

TH. BARTHOLINUS.

EPI-



EPISTOLA I.

De Cerebri Substantia pingui.

ILLUSTRISSIMO VIRO

FRANCISCO JOSEPHO BURRHO

S. P. D.

TH. BARTHOLINUS.

Antam nuper admiratio-
nem humanitas Tua apud
me concitavit, Laboratorii
stupendi splendor, excellen-
tissimum judicium, Naturæ inexhau-
sta scientia, ut nec satiari absens felicitis
diei memoria possim. Omnia enim fi-
dem superant & famam, quam magno
Tuo merito meritus es maximam. In
immensum auxisti beneficium, quod
A spem

spem certam commercii literarum
promiseris, quo nihil unquam gratius
mihi publicoque eveniet, ut per me
orbis sciat, quantum Tibi Natura debe-
at, Nosq; Tibi Naturæ promocondo.
De adiposo cerebro quod coram disse-
rebas, salivam meam movit: Quan-
quam enim *Hippocrates* Libr. De Car-
nibus, cerebrum pingue esse neget,
quia assari non potest: Vestra tamen
experientia facile dubitantes à veterum
consensu retrahit. Ad tactum certè
pingue deprehendimus. Materia quo-
que ejus pinguis est, oleosa nempe se-
minis pars, & lymphæ glutinosa. *Ari-
stoteli* si credimus lib. 3. Hist. Animal.
cap. 17. velut suis pingviusculum est.
In Cetaceo genere res liquida. Ex ce-
rebro enim balenarum sperma Ceti
opti-

optimum eructari, certa Mercatorum nostrorum in Islandia versatorum est observatio. In oculis quidem cranii vasti liquidior est adeps, sed maris frigore in eam formam condensatur, qua in Pharmacopoliis prostat. Apparet etiam in craniis puerorum cerebrum liquidius, interdum quoque præter aquam nihil, imo Cephalalgia, Epilepsia, Paralyseos & aliorum Capitis Affectuum causam in solo sero cerebri abundante sectio manifestavit nobis aliisque Professoribus non semel: Non ideò tamen pingue esse cerebrum desinit. Nam lymphilla illa cerebri & reliqui corporis, in gelatinam & glutinosam substantiam mutatur igni imposita, vel Aëris sali exposita, sicut exempla mihi nota testantur, qualis & in

Apoplecticis in cerebro nonnunquam à calore conficitur. Reapse condensari posse cerebrum, ossa ibi generata fidem faciunt, & lapides, imò univ-
sum in lapideam duritiem concrevisse non ita pridem de Bove Svecico accepimus. Sali coagulanti sine dubio hæc durities imputanda, quod quo modo in nonnullis contusis eliquetur, ut cerebrum fluidum per Nares auresque totum emungatur, sicut nuper in prædio Nobilis *Rosencranzii* accidit, nemo rectius nos docuerit, quam multiscius *Burrhus*, cujus maximo ingenio meliores assurgunt. Ab ejusdem quasi imperio, quod in morbos quoscunque feliciter exercet, luxurians in Apoplexia cerebri lymphæ, vel mordicans in Epilepsia & Cephalalgia, figetur facile
&

DE CEREBRO.

& temperabitur, vel arte evacuabitur, quam singularem in eo mortis candidati deprædicant. De excellenti tua virtute apud Te loquor, sed parcissimè, ne auribus aliquid dedisse videar. Res ipsa loquatur. Obsequentem ubique Naturam habes, & de Fortuna securè triumphas. Obnixè verò rogo, ne occupationum moles, quibus cotidie defatigaris, mihi promissas observationes cedro dignas præripiat, Tibiq; cui bene facere consuetudo est, benè merendi, mihiq; prolixius Tanti Viri, in seculi gloriam nati, æternas laudes deprædicandi, occasio intercipiatur. Vive porrò immortalis & me ama. Raptim ex prædio meo Hagested, X. Mart. cIo Ioc LXVIII.

EPISTOLA II.

De Cerebri ortu, & Usu Medico.

EXCELLENTISSIMO VIRO

D. THOMÆ BARTHOLINO.

TOta funditur Epistola Tua humanissima in gratæ laudis suave illicium, quo dum, Vir Excellentissime, exornas labores studii mei, pariter obstringis me ad communicandum Tibi publicè opinionem meam de Cerebri Ortu, substantia & facultate; quod eo lubentius aggredior, quo certior sum hæc scribi nutu candidissimi Viri, Anatomix vero Instauratori, ac liberæ Philosophiæ excultissimo Professori. Oritur cerebrum ex motu vivificante quem imprimit duplici semini utriusq; parentis virtus immortalis,

talis. Hæc est quasi Dei sigillum, in quo licet numerare diversa membra dissimilis profunditatis, latitudinis & longitudinis, & rursus quædam partes proportionem assimilantes geminari conspiciuntur. Idcirco motus vivificans ad numerum unius Vitæ concinnandum indiget pluribus modis, quia se movet juxta ingenitam mobilitatem omnium viscerum, à quibus emanavit, ut docere possunt observandæ exiguæ glandulæ, fibrillæ, bullæ, pelliculæ, spumæ, humores tenues & albescentes, alii densi & versicolorati in vertice albuminis Ovi sub diversa tempora Gallinis incubantibus surrepti. Differentiæ harum partium sunt veræ essentiæ quintæ Corporis Animalis, quæ augentur in fœtu, conservan-

fervantes vitale ingenium ac motum viscerum à quibus depromptæ fuerunt, eodem planè modo quo solent diversa genera salium vulgari lymphæ resoluta singulatim redire ad proprium pondus, & ens, mediante simplici sed lenissima destillatione, aut metalla omnia simul liquefacta, quæ separantur invicem, ut mihi notum est, solo differenti ministerio Ignis, quamvis in massam unam cohæsisse videantur. Hisce præmissis, à differentiis quibus motus animat semina, necessario constituitur in eis palpitatio haud deficiens, quæ dat incrementum hisce minimis viscerum essentiis, sedesq; peculiare tribuit, hinc glandulæ pingviusculæ agitatae à calore, ut mos est oleosorum, superiora occupare contendunt ad cere-

cerebrum efformandum; glandulæ sic-
cæ & compactæ ut cæteris graviores
centrum sibi quærant, & in Cor con-
glomerantur, glandulæ spongiosæ
concresecunt in lobos pulmonis, quæ
furfuracæ & bituminosæ sinistro loco
applicatæ extenduntur in lienem, quæ
lateritiæ & æruginosæ dextero sinui se
affigentes in hepar & fel intumescunt,
mox glandulæ, quæ mixtæ sunt ex
omnibus superiorum qualitatibus, in
densa renum emunctoria congloban-
tur. Sed ubi suis locis infixæ viscera
adolescere cœperunt, motu liberiori
palpitatio circumacta juxta imaginem
animalium, à quibus semina effluxe-
runt, effigiat mucaginem totum em-
bryonem involventem, quam exca-
vat in stomachum, perforat in inte-

B

stina,

stina, terebrat in venas, complanat in musculorum membranas, exsiccat in nervos, indurat in ossa, discriminat in Articulos. Tandem quia motus animantium tardus & materialis gubernatur à motu celerrimo & subtilissimo Universi, propterea foetus poroso amictu Epidermidis circuminduitur, eodemque tempore palpitatiōi comes adjungitur respiratio sub ea vi qua pisces utuntur in aquis, in cujus muneris gratiam superiorem viscerum conformationem descripsi. Ecquis enim non percipit respirandi necessitatem? plantæ ac animalia omnia vim ejus minimè ignorant. Nonne revera venti in aëre, accessus & recessus Oceani, sunt Systoles & Diastoles Universi Orbis Terrarum? Causæ verò effi-

efficientes respirationem, sunt variæ limphæ, diversi saporis & consistentiæ, ab istis fontibus viscerum profluente, sibi que per multiplices trames venarum in corde obviam euntes, ibique effervescentes atque in infinitas bullas spirituofas erumpentes ad pulmones, ut non semel ego vidi in tubulis vitreis pluribus vivacissimis liquoribus ad medietatem repletis, globoque vitreo minutissimo foramine pertuso ingeniosè agglutinatis. Hi validissimi liquores odore tantum se inficientes excitant, præsertim hyemali tempore, nubes vaporum subtilissimorum in globo, qui attrahunt ambientem aërem ut refrigerentur atque crassescant, eadem planè ratione ut fit in Animalibus, dum in eis ama-

ra dulcibus, acria oleosis, densa subtilibus, bituminosa lacteis, urinosa, redolentibus, corrupta corrumpendis moventur atque in unam perennem respirationem resolvuntur. Hic est homunculus ille Arnoldi & Paracelsi, à cuius scientia arcet ignavum, pecus difficultas ænigmatis sapientissimi horum philosophorum, quamvis indecori, quia semen, ut dixi, in se, habet vires omnium partium corpora constituentium, atque aëre vivit, ad cuius regulas præparari debent essentia quintæ à Chimico, videlicet eo artificio quo ab Aëre ali atque in unum corpus virosum coagulari possint. Aër est omnium Tincturarum Rector & Corrector planè divinus, vocaturque ingeniosè à prædictis Philosophis
arca-

arcānum sanguinis, quo nutriri debet eorum infans artificialis. Sed hæc obiter. Transeamus ad alia. Superius in eam deveni sententiam, Cerebrum esse pingue. Nunc addo, quod propter hanc causam sit quoque candidissimum. Vidisti absque dubio ab Alkalinis liquoribus apud Smegmatistas omnes pinguedines transmutari in album Saponem: modo planè eodem medulla cerebri degenerat in candidam ac sinuosam offam, dum sua pingvi mollitie obtundit acres spiritus vitalium lympharum, cujus necessario officio propriè quando dormit dicatum est Cerebrum, sed vicissim acrimonia horum spirituum segnitie pinguitudinis ejus habiliorem reddit ad motum celerrimum obeundum,

atque sua falsilagine trahit in se vim
aëris inspirati, eamque liquat in ro-
rem subtilissimum suavissimæ redolen-
tiæ à paucis delibatum. In hoc rore
sacro fertur spiritus ille in quo habitat
anima nostra rationalis, cujus roris
optimæ temperiei magis tribuendum
censeo acumen ingenii quam totius
cerebri speciosæ figuræ. Ideò plures
vulnerati in Capite optimo ingenio
valent, quamvis ipsis substantia cere-
bri cum cochleari ante nonnullos an-
nos extracta fuerit. Imò Romæ ho-
mini plebejo extincto ab usu nimii
Tabaci caput apertum fuit, cujus ce-
rebrum condensatum erat & nigri-
cans, atque redactum ad exiguum
grumum membranaceis involucris
coagmentatum; nihilominus faculta-
tes

tes animales suo officio fungi non desinebant usque ad finem. At ne Te prætereat quid in destillatione suppeditaverit mihi cerebrum Vitellinum, scias tres partes ponderis illius abiisse in aquam insipidam, partem unicam circiter contractam fuisse in massam pinguem & flavescentem à qua prælum calidissimum expressit oleum combustibile, insigne Anodynum ad leniendos exterius applicatum dolores podagricos, quod in modico frigore gelascit quasi fuisset eductum à squammis spermatis Ceti. Aqua hæc insipida clausa hermeticè in Vitro, incorrupta sæclum durabit, sed in aperto vase olet fetorem vetustæ muriæ. Epistolæ jam diu transgressus sum limites, & nondum explicavi, quam

quam ob causam migret aliquando cerebrum in Aquam glutinosam, in saniem atque in lapidem. Sed compendiose dicam omnia salia qualiacunque sint constare ex sulphure dissoluto in majori vel minori cinerum vel liquatarum arenarum quantitate, quod sulphur quamvis invisibile, à suis contrariis oleosis facili negotio ab omni sale separatur. Hoc sulphur ascendit una cum limphis vivificantibus ad cerebrum, ubi edulcoratur, quod si prorsus retundatur in eo ponticitas fiunt limphæ insipidæ, quæ nihilominus assumunt vim lapidificam atque exsiccantem, nam omnes lapides oriuntur in locis ubi nullus sapor salis evidenter gustui depræhenditur. Propterea Vitrarii ad reducenda

cenda vitra ad debitam tenacitatem, sæpius extingvunt vitrum liquefactum in Aqua dulci, & quo magis extinctio Vitri in Aqua repetitur, eo clarius & durius opus Vitreum emergit, nihilo secius vitro vitrum attritum sulphureum ex se transmittit odorem. Summus est error Chimicorum, tribuere salibus vim coagulandi, cum sal attenuet omnia corpora, sed sulphur, ut in Cinabrio patet, eadem adstringat, nam caseus, caro salita, sapo resolvuntur temporis tractu in pulveres unctuosos. Chalybs ideò frangitur, non quia sit à cineribus magis coagulatus aut à salibus, sed potius, quia in omnibus suis poris magis rarefactus est à sale, propterea sæpius restinctus oleo quod in se bibit inhæ-

C

rens

rens fal tandem fit tenax & malleabi-
le ut ferrum vulgare. Vale, Vir Ce-
leberrime, & immortalitati hisce scri-
ptis me non consuluisse excusa, quia
scribebam hæc raptim prope Cœmite-
rium, ideo decidua esse debent, ubi
tamen immortale profitebor obsequi-
um præclarissimis ingenii Tui labori-
bus. Dab, Hafniæ 24. Jan. 1669.

Addictissimus & Perennis
Cultor & Servus

BURRHUS.

EPI-

EPISTOLA III.

De Oculorum Suffusione.

ILLUSTRISSIMO VIRO

FRANCISCO JOSEPHO BURRHO

TH. BARTHOLINUS

S.

Non satis narrantium oculis hactenus habuissem fidem, quam certissimis, qui mihi artificium Tuum, læsos oculorum & exhaustos humores restituendi, plena admiratione & propria *αὐτοψία* deprædicarunt, nisi idem nuperrimè mihi constantissimè confirmasses, liquore ipso aureo monstrato. In animalibus brutis, anser, fele, agno, sæpius factam à Te esse experientiam, Tibi nar-

ranti soli credo. Ulterius verò in
homine periculum Te facturum, in
Te recepisti, meque istius operationis
testem vis, quandocunque commo-
dum subjectum oblatum fuerit. In-
terea dum hanc moram ægerrimè fe-
ro, discendi non dubitandi animo,
quia in hoc artificio magna sanitatis
humanæ pars consistit, Excellentissi-
mam Tuam pennam sollicito, quam
pleno officio non ita pridem obtuli-
sti. Orbem universum excitasti fa-
mâ insolitæ operationis; prorsus ex-
satiabis, si, ex condicto, seriem mihi
modumque detexeris, & aurei liquo-
ris Compositionem. Quicquid mihi
revelaveris, Tibi in gloriam, quam
tanto secreto meruisti, æternam ce-
det, mortalibus verò, quibus invigi-
lasti,

lasti, incredibili emolumento, si bona
Tua cum venia, publicis chartis lega-
tur. In auctoritatem scientiæ Tuæ e-
rit, tantum mysterium plures docu-
isse. Fuere quidem nonnulli, qui in
hac oculorum palæstra se strenuos
exercuerunt, sed infra Tuam solerti-
am substiterunt. CrySTALLINUS enim
humor à suscepto omnes deterruit,
quanquam in aqueo & vitreo restitu-
endo nonnihil operæ insumserint.
Illius ex vulnerato oculo effluentis
regenerationem vidit *Galenus* Lib. 1.
de Sympt. Caus. cap. 2. observavit
Coiter in Obs. Anat. Chir. descripsit
Benivenius cap. 74. de Abd. exemplis
illustravit *Schenckius* in Observationi-
bus Medicis. Nec de vitreo inaudita
res est, cujus defectum albumine ovo-

rum supplevit olim *Duncanus Lidde-*
lius, Medicus percelebris. Succum
Ulmariæ mense Majo collectum ab
Henrico ab Heer Obs. Spod. 4. in gallo
gallinaceo & puella oculorum utrum-
que humorem reparasse scribitur.
Quid statuendum sit de historia *Guic-*
ciardini, eruti oculi & repositi, aliis
relinqvo judicandum. In suffusione
internis externisque passim pugnatur.
Aqua Anagallidis purpureæ destillata
multos à suffusione liberatos oculis
instillata *Hollerius* prodit Lib. i. cap. 21.
Sed de crystallino humore nemo hic
cogitavit, in qvo restituendo ingeni-
um manusque hætenus nullus ob-
strinxit. Hunc tam difficulter posse
reparari, quam periculosè abesse, ab
omnibus creditum. Medium qui-
dem

dem tantum censetur, per quod species rerum visibilium refringuntur, vel conjunguntur, eo tamen retina, tunica carere non potest. Hinc certa illi figura assignata pro vario visus modo, tunica subtilissima obvelata, chrystalloidea, quæ retinæ tunicæ est expansio, adeoque nervosa, ut prorsus difficilis videatur ejus regeneratio, & periculosa læsio. Sunt quidem, qui Cataractam, seu suffusionem, in humoris hujus fluiditate constituent, me invito nec consentiente. Nam quando matura est & spissa, stylo curatur per depositionem seu remotionem humoris in cornea congesti, salvo crySTALLINO, medicamentis autem acrioribus & amaris in suffusione necdum confirmata, non condensatur
cry-

crystallinus, sed discutitur humor extraneus qui se crystallino opposuit, idque certis observationibus, monente *Celfo* lib. 6. cap. 6. §. 35. Incrassationem crystallini *Quarreus* Parisiensis invexit post *Galenum* Lib. 1. Sympt. Caus. cap. 2. sed vel incurabile malum indicat, vel si deposita fuit unquam suffusio, talem crystallinum reliquit, qualem invenerat. Habet quippe consistentiam duriusculam, quæ vel calore exsiccat magis, vel ab aëre, sicut in exemptis hominum, brutorumque & balenarum crystallis observavimus. Plerumque igitur *ὑπόχυσις* se oculi pupillæ opponit, non vitians crystallinum, nisi alius affectus jungatur. *P. Vegetius* lib. 2. Art. Veter. cap. 16. suffusionem uno hoc (non

(non visu, ut rectè corrigit *J. Sambucus*) indicio declarari docet, quod in pupilla ipsius imaginem tuam tanquam in speculo videre non possis. Morientium aliàs signum id veteres superstitiosi habuerunt. De Pertinace enim Imperatore *Ælius Spartianus*: Ea die qua occisus est, negabant in oculis ejus pupillas cum imaginibus, quas reddunt spectantibus, visas. *Servius* Grammaticus ad Virgilium, ex *Physicis* refert pupillas in oculis morientium ante triduum non haberi, imò ipso mortis tempore albescere. Quod malè ad hunc *Virgilii* versum ex Lib. 4. *Æneid.* notat.

*Dat somnos adimitque, & lumina
morte resignat:*

D

Re-

Resignare enim hic est aperire, ut rectè interpretatur *Adr. Turnebus* Lib. 24. Adv. cap. 26. idque ex Romana consuetudine, quæ mortuis in rogo oculi aperiebantur, qui ante domi ab amicis clausi fuerant, ut neque ab homine supremum eos spectari fas esset, & cœlo non ostendi nefas, sicut loquitur *Plinius* Lib. XI. cap. 37. In his tamen non crySTALLINI vitium notatur, sed luminis calorisque innati defectus. De cœcitate alia res est, quam crySTALLINI humoris vel vitium vel defectus provocat, cui inaudita felicitate oculifera suggeris. Cœcitatis causam esse crySTALLINI effluxum sua experientia probat *Felix Platerus* Lib. I. Obs. p. m. 114. ejusque defectum fuisse in cataracta nigra cum vitreo in aquam
reso-

resoluto, observavit *Guern. Rolfin-*
cius Lib. 1. Dissert. Anat. cap. 13. Ex
lamellis compositum in oculo cœcæ
mulieris vidit *Stenonius* noster in A-
nat. Charcar. Quicquid sit in his ali-
isque Tu Lynceus doces superare
Polyphemum. Ex quacunque enim
causa crySTALLI vitium in quocunque
affectu dependeat, modò integræ sint
tunicæ, tuus spiritus pollicetur salu-
tem. Sed Te audire de hoc arcano
differentem arrectis auribus mecum
curiosi omnes exoptant, ut tandem
tantæ operationis expectationem
magnificè expleas. Certus sum non
paucos dubitare, nec ignoro alios
laudem primam Tibi invidere. Hos
sperne, illos doce, sed ama applau-
dentes. Dubitantes doce, quibus-

nam oculorum affectibus arcana Tua,
Operatio profuit? An ad guttam sere-
nam auxilii quid supersit? An cali-
gantibus ex lippitudine vel propter
Senectutem oculis exinde visus redu-
catur? Præterea scrupulum exime sa-
tis molestum, quia vi simplex spiritus
in triplicis medii consistentiam diver-
sam variamque figuram concreascit?
Quo modo crystallinus humor ita de
novo effigiari possit, ut nec insolita,
figura variet, nec à situ priori aber-
ret, quo inhibeatur ne, si situs pec-
cet, res una gemina videatur, vel vi-
tiata figura globi in antica parte vel
postica peccans myopes &c. efficiat.
An in homine major vel difficultas
vel apparatus requiratur? An pro
oculorum in individuís diversitate,
cura-

curatio varianda? An cum naturali-
bus humoribus paria faciant novi re-
generati, ætatemque ferant? An post
expressionem humorum, ad pristi-
num globum oculi reduci queant ma-
nuum opera, vel ligatura, vel sponte
sua ab infusis denuo spiritibus? Quid
tunicas subtilissimas resarciat? Quæ
instrumenta desiderentur ad operati-
onem tam arduam, nec ullius vesti-
giis tritam! Elegans fuit olim per na-
res curandæ suffusionis ratio ex au-
thoribus Veterinariis à *P. Vegetio* Lib.
2. Art. Veter. cap. 21. tradita. Tenu-
em fistulam in foraminibus subtilissi-
mis in ipsa callositate (malim legere,
cavitate) narium inserit, per quam
ille qui curare debet, os plenum vino
insufflet, ut merum penetret per in-

teriores venas ad oculum. Foramina illa accuratius deinde detecta & descripta fuerunt à *Stenonio* nostro in *Observat. Anat.* Revixerunt illa, cum ipsa operatio perierit. An verò oculus ipse extra orbitam eliciendus, inter nescios quæritur? Hanc oculorum expressionem *Aëgineta* fusius persequitur Lib. 3. cap. 22. & *Actuarius* Lib. 2. M. M. cap. 7. Et quibus rumpuntur ita oculi, posteaque adeò exstant, ut pupilla loco mota videatur, ullo tempore, aut arte, ut videant, opem ferri posse negat *Hippocrates* Lib. 2. Prædict. Nihil de hoc ἐκπεσµῶν, in amico colloquio submonuisti, ut valdè dubitem de fide Dn. *de Monconys* Galli, qui de secreto Tuo ex relatione Canonici *Septalii* Mediolan-

nen-

nensis differens in Itiner. tertio Italiae
pag. 492. hæc scribit: *Il me dit che le
secret de Borri de remettre la veüe
à un animal apres luy avoir sorty l'oeil
de la teste, & l' avoir incise dans l'
humeur aqueuse, pour veu ch' on n' eut
point bleßé le nerf optique ny les au-
tres humeurs, estoit de mettre dans la
playe du jus de chelidoine grande, &
puis la couvrir avec un peu du marc;
mais ch' il faut che l' operation se fasse
sur le marbre, & empecher que l' ani-
mal ny touche & ne l' ouvre, ce qu' il
fera si l' on n' en à gran soin à cause
de prurit que cela luy cause. Nec sa-
tis ex dignitate & amplitudine Tuæ
artis, solius aquei humoris meminit,
cum omnes sine discrimine exprime-
re possis & restituere. Cæterum de
Che-*

Chelidonio majori, hujus secreti particula, quæ *Septalius* suggessit, an, Tuo calculo approbes, aperire mihi non gravaberis. Quod si feceris, non novorum tantum Naturæ munerum Te inventorem, sed veterum quoque Medicorum lectione communem seculi hujus eruditorum fortem, & diligentiam supergressum agnosceamus. Nihil enim in oculorum vitiis emendandis, in primis in suffusione curanda præstantius chelidonio majori veteres Medici invenerunt, idque vel manifesta vi extergendi & discutien- di in suffusione, vel occulta ratione in cœcitate quacunqve. De suffu- sione *Galenus* Lib. 8. simpl. Med. Fa- cult. Succus ejus ad acuendum visum commodus est, utique in quibus cras- sum

sum quiddam in pupilla colligitur digestionem atque discussione indigens. Valenter enim abstergit, consentiente *Aegineta* Lib. 7. cap. 3. unde succum ejus claritati oculorum utilem ait. *P. Vegetius* quoque Lib. 2. Veter. cap. 16. in Stenochoriasi, radicem foeniculi, & herbam celidoniam vel rutam decoquit ad tertias, & cottidie ea aqua oculum fovet. *Dioscorides*, qui magnum momentum huic argumento affert, Lib. 2. cap. 211. succum in æreo vase cum melle prunis decoctum, oculis claritatem testatur addere, propter mordacem, acremque succum. *Idem* in fine capitis ad coecitatem occulto principio commendat, sed ex aliorum narratione, hirundines enim matres excoecatis pullis, ad-

E

mota

mota herba visum restituere. Sequitur Dioscoridem *Avicenna* Lib. 2. tr. 2. cap. 199. Etiam oculis erutis id præstare *Plinius* Lib. 25. cap. 8. autor est, sed, quia dubitat, addit; *ut quidam volunt.* Nam fabulam vocat *Celsus* Lib. 6. cap. 6. Nobis verò ad veterum dubitationes sufficit, *Burrhum* dixisse, qui vetera confirmat, nova repperit veteribus ignota, ubique magno ingenio & pari Naturæ experientia regnat. In veterum tamen excusationem eleganter ad *Symmachum*, *Ansonius* Edyll. XI. Alius alio plura invenire potest, nemo omnia. Sed Te, *Illustrissime Burrbi*, pro oculis per oculos rogabo veteri more, & ut cum *Milesio* Scriptore, ex magni *Lipsii* emendatione, Epistolæ præter spem,

spem, non præter officium prolixæ,
finem imperem: Patere, oro Te, in-
quam, dum dictat occasio, magno &
singulari me affectionis tuæ fructu per-
frui, & impartire publico artificium
oculorum tanto opere desideratum,
per istas tuas pupillas: ne posthac ul-
lus timeat oculorum fidem. Vale
diu, Naturæ ocelle, ut, qui tam acu-
tum vides, aliorum quoque lumina
porrò illustres. Scripsi in Tuscu-
lano meo Hagestedano XXX.
Januar. clb lbc LXIX.

EPISTOLA IV.

*De artificio oculorum humores
restituendi.*

CLARISSIMO

D. THOMÆ BARTHOLINO.

Tibi hoc seculo vero Palladis ocu-
lo absque suspicione exoculatae
mentis denegare nequeo com-
municationem artificii, quo multo-
ties dissectos profundè ac transver-
sim brutorum hominumque oculos
ad pristinum statum tam feliciter re-
stitui Amstelodami, 'ut nec litura ci-
catricis minima superesset'. Præmit-
tenda tamen erit primum historiae
narratio, qua certior fies, quo modo
pervenerim ad arcani hujus cognitio-
nem. Commorabar Romæ studio-
rum

rum causa, cum ad aures meas fama deferret à Serenissimo atque Musarum omnium Generosissimo Fautore, Principe *Johanne Paulo Jordano Ursino*, nunquam satis laudandæ memoriæ, dissectos pariter & restitutos fuisse oculos multorum animantium, artemque eidem insinuatam ab Equite Neapolitano ob tumultus bellorum civilium exule à patria. In immensum flagrabat animus amore hujus tam raræ scientiæ, ut nescio quid non impendissem argenti, quo tandem possem tanti arcani particeps fieri. Sed Eques ab urbe Romana discesserat in patriam, quam propter unicam hanc causam adire decreveram. Inter hæc funera pestis, epidemico luctu defœdant prius Neapolin, subinde Romam,

& me post viginti duos annos consumptos in studiis & experimentis Philosophicis vindicant patriæ meæ Mediolano, & magno animi dolore remouent à desiderato colloquio præfati Equitis. Hinc tam longè à veritate deflectunt ii qui Neapoli, quam nunquam vidi, asserunt à me exercitam fuisse Medicinam: Sed hoc seculo corrupto licet nonnullis ranis foetentibus talia coaxando effutire mendacia è suis stercoreis atramentariis, ut veritatem confundant. Cum igitur ex Italia in Germaniam & è Germania Amstelodamum fors varia me transtulisset, visitabar ab humanissimo Equite *Roberto Sothuel*, natione Anglo, cui cum quædam rara in Chemicis ostendissem, placuit in redhosti-

men-

mentum non solum propriis manibus
patrare mirabile hoc artificium in
oculis anseris, verum etiam liquoris
scientiam mihi ingenuè impartiri,
quam nactus erat apud eundem præ-
dictum Equitem Neapolitanum cum
forte fortuna ambo exciperentur Flo-
rentiæ eodem hospitio. Aqua hæc e-
licitur è foliis chelidoniæ per MB,
cui ad arcendam putrefactionem su-
peradditur in phiala granum campho-
ræ. Hoc est totum arcanum mihi
revelatum à Generoso Equite *Roberto Sothuel*, & est unicum quod illi ac-
ceptum refero. Sed ut reddam ra-
tionem villicationis meæ, adjiciam
ea quæ à me inventa sunt. Inprimis
hac aqua restituuntur citissimè oculi
exsecti avium, & tanta cum venusta-
te

te micat in eis iris & fulgor radiorum, ut longè superet pulchritudinem oculorum naturalium; imò in iis qui bis dissecti fuerunt, ad ostendendam Medicis regenerationem omnium humorum, lævigantur tanto splendore renati oculi, ut niteant quasi essent gemmæ Orientales, cujus repetitæ oculorum Palingeneseos in suis carminibus ingeniosum præbuit testimonium Doctissimus Dn. *Olaus Borch.* Sed summâ diligentiam vitanda est nervi optici læsio, quæ statim prohibet miraculi eventum. In quadrupedibus, quantumvis sint catuli, diuturniori diligentia oculi scissi reparantur. In eqvo bimulo, quia eqvorum humor crySTALLINUS habet corneam duritiem, non successit experi-

perimentum, sed cum aqua majoris
artificii inferius revelanda optato e-
ventu potiti sumus. Hac simplici fo-
liorum chelidoniæ aqua feliciter acies
suas acuunt oculi cæsi, ut mei sunt,
qui ad distantiam septem passuum le-
gunt hodie characteres libri impressi
in folio, & vice versa quamvis minu-
tam scripturam sibi omnino prope
appositam perfectè distinguunt. Post
cæsi laudant vim hujus aquæ cæru-
lei, glauci & albicantes. Sed nigrican-
tibus exiguum ab hac lymphæ speran-
dum est auxilium. Neqveo satis mi-
rari causam cur omittant Medici in-
paranda aqua chelidoniæ radicis u-
sum, quam si transversim secueris
etiam hoc hiemali tempore perfectè
tibi referet imaginem oculorum pfit-

F

taci

taci blandientis. Novi vetulam octogenariam Germanam, quæ poterat acu etiam quævis phrygia opera subtilissimè pingere sine perspicillis; & consveta erat singulis annis semel in æstate purgare oculos infusa, sed minima stilla liquoris expressi ab hac radice, qui dolores acerrimos excitans in eis educit humorem salsum, excipiendum subtili panno lineo & exsiccandum in gluten. Has vires de se modo in succum, modo in aquam resoluta promit chelidonia major. Sed efficacius remedium comparavit mihi exinde hoc à me excogitatum artificium: nam ejus vires longè excedunt operationes Neapolitanæ aquæ. Mandanda igitur sunt terræ purissimæ virginæ, cui sit admixta vigesima pars

pars ponderis ex floribus sulphuris, femina chelidonii: in vase ferreo relinqvantur sub dio, donec adolescant in plantas, quarum pars altera in interlunio excerpatur una cum radicibus absque ulla ablutione vel contusione, à quibus fugatur æther subtilissimus inhærens poris omnium vegetabilium. Conjiciatur in cucurbitam vitream cum sua galea rostrata & excipiente optimè ferruminato: inde construatur fimus artificiosissimæ subtilitatis ex ingenti quantitate chelidonii ad aërem expansi per diem unicum sub tecto pervio à Solis radiis arefacti; quo validè compresso infarciatur fovea lignea, in cujus medullio post octiduum effervescenti sepeliatur alembicus & spatio sex heb-

domadarum aqua extrahatur virium omninò admirandarum. Quibus nul-
latenus dubito præferri vires dulcissi-
mi phlegmatis vitrioli martis, modo
inferius tradendo, destillati à me ad
hoc officium, quod sciam, primum
adhibitum. Nam in restituendis o-
culis dissectis nigricantibus prævalet
chelidonio quovis artificio elabora-
to; præcipuè si in eo fuerit aliquo-
ties extincta auri candentis libra se-
mis. Plures Chemici spernunt hanc
auri finissimi in potabilibus ab anti-
quitate præscriptam extinctionem.
Verum absque experimento: quia
non semel ego affecutus sum curatio-
nes erysipelatum & exedentis Mor-
pheæ, simplici extinctione auri in li-
quoribus appropriatis. Imò ad se-
dan-

dandam diarrhæam & cordis palpi-
tationem in hanc usque diem nullum
præstantius licuit experiri medica-
mentum simplici extinctione auri fi-
nissimi per antimonium trajecti, in
vino vel aquis florum rosarum, bor-
raginis &c. & tandem deprehendi,
quod auri pondus frequenter adhi-
biti ad hunc usum insigniter imminu-
atur; atque color ejus in superficie,
utut radians, rubigine subcinerea at-
que subrubra obducatur. Et ne cre-
das infici aurum à cineribus carbo-
num, scias omnia experimenta hæc à
me instituta fuisse clauso crucibulo,
& non semel tentatam auri extinctio-
nem in libra unica aquæ pluvialis au-
reo atque optimo vase exceptæ.
Cumque à repetita extinctione aqua

redacta esset ad quantitatem uncia-
rum trium, color ejus videbatur la-
cteus, verum si ad siccitatem à distil-
latione urgeretur, relinquebatur ci-
nis, ex quo in capella aliquid auri
colligebatur. Omnia composita dis-
solvuntur à motu ignis & aquæ, quic-
quid alii sentiant in contrarium hujus
experientiæ innixæ experientiæ soli-
dissimo fundamento. Nec silentio
nunc involvi debent animadversio-
nes de Vitriolo, Martis opificio, à sin-
ceritate mea. Quin imò cum supe-
rius docuerim per sui fimi herbaceum
artificium unumquodque vegetabile
ad conservandam in eo occultam qua-
litatum proportionem, necessario re-
solvi debere, nunc quoque candide
aperiam modum quidem simplicem,
sed

sed omnibus Chymicorum ergasteriis
hactenus inauditum: nempe excitandi
ignem in frigido ferro. Sumantur
recentis ac tenuioris limaturæ ferri li-
bræ decem, aquæ fluvialis vel fonta-
næ purissimæ aut destillatæ libra una;
manibus in amplo vase hinc inde subi-
gatur, donec à crebra agitatione æ-
qualiter madescat limatura, qua vas
vitreum ultra medietatem repleatur;
ei sua galea cum recipiente adaptetur
& inter plures pannos siccos mundos
collocetur, ita ut vas ab eis undequa-
que sit circumvolutum: elapsa ses-
quihora præter propter vas mirum,
in modum non secus ac solet calx vi-
va, effervescent; & aquam transfun-
det mirabilis facultatis, tam ad usum
dissectionis oculorum spadiceorum,
&

& nigricantium, quam ad alios insignes usus medicos. Et quanquam expers futura sit acrimoniæ, multo tutius & efficacius vulgari omni liquore chalybeo suas vires exferet, quia in ea qualitates sunt planè dissociatæ ab excrementis. Refrigerato vase limatura constipata erit in lapidem ferreum durissimum, ex qua elicitur vitriolum suavissimum per singulare artificium meæ secretiori voluptati dedicatum.

Cæterum oculorum dissectio requirit levem manum industrii Anatomici, quæ scindat longo vulnere humores, nec ultra oculorum orbitæ meditullium ferrum immittat; nam læsis profundioribus fibris, pululan-

lulantibus à nervo optico, erit curatio difficilis, aut infelix. A me nullæ tunicæ evelluntur, sed molli digitorum pressione humores tantum ab illis eliciuntur. Sed si, ut plerumque contingit, viscida siccitate laborent membranæ, artificii tunc opus est longiori temporis spacio, & solertia summa, in repurgandis filamentis continuo manantibus ab utroque vulneris margine, eaque semper detergenda veniunt liqvoribus superius indigitatis. Non salutassem è longinquo medicinæ fores, nisi tecum agnoscerem dissectos oculos facilius in juvenibus reparari quam in senibus, quia juxta *Stenonii* laudandam observationem, humor crystallinus nondum in pubescentibus in multiplicia,

G

con-

concrevit velamina; cum alioquin
idem longo tempore elixatus & ab
aëre exficcatus examinante contusi-
one crassa, & microscopio repræsen-
taverit aliquando mihi innumeras
quasi subtilis furfuris squamulas.
Cum pisces elixati heri vesperi mihi
inter fercula apponerentur, excer-
pebam ex eis humores cristallinos,
quos leniter ab hypocaufti calore ex-
ficcatos, in concavas lamellas dissili-
entes monstravi. Quæris, quomo-
do altrix natura conglomeret spiritus
harum aquarum in humorem crystal-
linum? Citra omne dubium molitur
hanc indurationem per tubulos nervi
optici, ex quibus effluunt spiritus
subtilissimi, aërei, elaborati ad vitam
omnium humorum & membrana-
rum.

rum. Et quia calor coarctatur in centro uniuscujusque globi, ut patet in cacabo bullienti, cujus tota superficies tam fundi quam operculi impunè à digitis tangi potest, etiam in summo ejus fervore. Propterea humor crystallinus, si pori in medio nervorum non sint obstructi, necessario debent indurari à centrali calore vivificante. Nulla ligatura aut alio instrumento quam cultro opus est ad hanc restitutionem. Mihi non fuit incognitum experimentum succurrendi per nares oculorum hebetudini. Quo loco non omittendam censeo mentionem rari instrumenti ad deponendas oculorum Cataractas inventi à Nobili Domino *Roccho Mattioli*, Chirurgo Italo olim à servitiis

Archiducis FERDINANDI CAROLI
Austriaci, nunquam sine lacrimis ad
piam memoriam omnium Heroum,
atque Sapientum à me revocandi ob
regias animi dotes, tum ob ingentia,
honorum & divitiarum in me cumu-
lata beneficia. Artifex iste excogita-
verat arundineam acum desinentem,
in vacuum mucronem, qua penetra-
re oculos & per eam oris suctu extra-
here posset cataractas; sed cum exilis
orificii angustia & crassities membra-
næ sugendæ solertiam ingeniosi arti-
ficis remorarentur in perficienda ope-
ratione, ipsi Auctor fui includendi
suo tubulo æneo acuminato in mo-
dum tenuis penicilli subtilissima Auri-
textilis filamenta, quæ in girum
acta à contorquentibus digitis, dum
acus

acus tenebat medium orbitæ, educentur quasi ex ænea vagina, & humorum instar membranam vel interciperent vel omninò in frustilla discerperent, atque iterum post hoc officium retrahi possent ad angustias sui ænei integumentì. Votum eventus felicissimus beavit, quia cataractæ per hoc instrumentum depositæ non ultra assurrexerunt ad eclipsandam lucem radiorum, cum alioquin eæ quæ à vulgari acu demittuntur paulatim à motu oculorum, ut nondum divulsæ à suis radicibus, eriguntur. Hac occasione referam, sensum dolorum exquisitum in sola superficie corneæ perforanda percipi ab eis quibus oculi sunt transfodiendi vel secandi, sed quam primum acus vel culter re-

gionem internam aliorum humorum vel membranarum adortus fuerit, nullo prorsus dolore affici patientes ab injuria vulneris. Longissima serie narrandarum curationum locupletare possem hanc Epistolam, sed una vel altera ex rarioribus tuam eruditam oblectationem fortasse augebit. Cum degerem Argentorati, conveniebant me parentes Virginis venustissimæ, ut succurrerem ejus oculis perpetuo lacrimantibus. Dixisses geminos Soles mergi oceano lacrimarum, quibus nulla ab oriente advecta pharmaca administrantibus Medicis quampluribus opem ferre potuerant. Attamen cum decocto in simplici Aqua ossium bubulorum absque medulla & palearum tritici, spatio trium hebdo-

hebdomadarum restituebatur. Qvis hoc crederet? Sed illius Urbis testis omni exceptione major, felicissimus Archiater multorum Principum Germaniæ *Joannes Kufferus*, ob singulares animi & ingenii dotes quondam à me conscius electus secretioris meæ praxeos, huic historiæ fidem faciet. Eodem sæpe Amstelodami sum usus medicamento, ubi opus fuit exsiccare humores serofos, nec me optato eventu destituit usquam spes collocata in tam rudi adminiculo, usque adeò Dei Summa Providentia elucescit & in tenui stramine. In delendis albi oculorum nodis & corneæ unguibus suppeditavit blandum corrosivum fel humanum destillatum per M. B. ex cucurbita & galea ænea; sed
in-

inflicta eis vulnera mirabiliter obducit Aqua Albuminis ovorum. Cor meum, ut novisti Amice, defatigabit semper insatiabilis scientiarum aviditas. Porro vix defuit quin experimenta me novum effecerint Deucalionem, ut cunctis morbis prodesse possem. Ideò manus meæ lapidibus non pepercerunt, & inter eos qui dicitur Oculus Mundi. Si aquæ vel aliis liquoribus immergatur, eis virtutem magnam communicat, nempe extinguendi omnes in oculis recenter subortas flammæ. Nam stupendum, cum sit opacus, quam primum humores attingit in Hiacinthum transmutatur, atque iterum aëri expositus suæ exiniæ virtutis sedulus custos salubrem lucem suam in se contrahit, ite-

iterum eandem ostensurus quoties
perspicuam suam claritatem liqvoribus
infundere opus fuerit. De pro-
pendente verò oculo extra alveolum
suum ad longitudinem transversi di-
giti addo, restituisse me in Nobili
quodam Hagæ-Comitis per astringens
collyrium & emplastrum defen-
sivum Vigonis collo applicatum, ut
æger benè postea valuerit. Brevi epi-
stolæ gyro velle omnia comprehen-
dere experimenta, quæ multorum
annorum ambitu data diversa occasi-
one molitus sum; me hercule non
minoris laboris esset, quam si unica
atramenti stillâ totum hoc scriptum
exarare voluissem. Ipsa namque
atramenti nigredo refricat mihi me-
moriâ, me lividis atque tumidis

H

ocu-

oculorum sugillationibus opem tulisse, applicatis aperti oris labiis, atque in eos fotu halituosi anhelitus immisso, ex tempore sedasse dolores omnes. Immo multoties contigit, quod humidus tumor ex morfu araneæ venenatæ aut alius Symptomatis affluxu oculos inflaverit in modum folliculi, quibus cum præviderem longè petita auxilia ab exsiccante epithemate parum aut nihil profutura, ut in hoc casu prompto præsidio medicina quoque apud me non destitueretur, excogitavi mollem scarificationem per lanceolas ferreas quidem, sed quas ob subtilitatem diceres papyraceas. Jubebam tunc Chirurgo, ut lanceolas infingeret directè in sulcos corrugatæ cutis tenuissimos. Nam si
inci-

incisiones obliquo ductu in contrarium extendantur, nulla tunc fit humoris transfusio, & ægros turpi afficiunt inflammatione. Apparet ex hac felici incidendi regula, quam tenax conservatrix suæ vivificantis potentiae sit alma Natura, citra cujus indulgentiae limites non licet servo artifice manu medica extravagari sine artis & nominis sui dedecore maximo. Post incisionem juxta tumoris magis vel minus extuberantis exigentiam profundè aut superficie tenus adhibitam, applicanda venit incisuris cucurbitula in modum galeæ destillatoriae conflata, & per ejus rostrum Chirurgus leni suctu eliciat peccantes humores sanguineos, salios, insipidos, lacteos, flavos. Quod

si vulnera nimis cito consolidentur,
& exundet humor quasi in vesica
contentus, licet nova incisione cu-
tem adoriri: quia in hac operatione,
ægri nullo ferè dolore torquentur.
Interim non negligendus sequentis
linimenti usus. Æstivo tempore
capiantur ranæ viventes in plenilu-
nio, quibus detrahantur exuviae &
eximantur viscera; suspendantur filo
alligatae mutuo sese non tangentes in
hypocausto à pulvere & humiditate
immuni, ut arefiant. Tum in pul-
verem redigantur subtilissimum, cui
admisceatur tertia pars farinae amyli;
tutiae, & boli Armenae ana quarta
pars, & ungventi rosacei infrigidan-
tis Galeni quantum satis, ut hæc
omnia acquirant justam linimenti
con-

consistentiam, quod potenter subtus
latentes humiditates quascunque ex
quavis corporis parte blandè educit,
adeo ut liceat intacta cute interdum
guttatim defluentes tenuiores humo-
res adspicere. Cæterum vidi canem,
cui bis utrumq; oculum dissectum re-
stitueram, post quinque annos iisdem
uti integra omnium oculi partium
configuratione. Si rectè operatio in-
stituatur, deletur omne vestigium
cicatricis in quovis animalium dissecto
oculo. Guttæ serenæ supra dicti liqvo-
res in fumum resoluti & per tubulos
æneos ab oculis excepti promiserant
auxilium uni ex Comitissis Bredero-
dianis, si potuisset in longa curatione
perseverare, quia alternis diebus po-
tuit mihi & aliis indicare numerum

digitorum in extensa manu post duos menses ab usu hujus vapidi suffumigii. Sed digiti apparebant ei, ut nobis corporum umbræ apparent in Sole. Postremò monendum, ex fecibus relictis post destillationem à chelidonio fieri collyrium lippitudini oculorum planè proficuum. Coqvuntur in adipe galli cum tantundem olei expressi à luteis ovorum, & cum satis assatæ fuerint, adduntur oleis pro lubitu guttæ aliquot expressi olei à seminibus chelidonii. Amuletum olim syncipiti alligarunt conflatum ex pulvere vitrioli & radicis chelidonii, super insperso lupi oculo, & ad aërem simul arefacto non sine magno fructu olim ægrotantes mei, ex quavis oculorum affectione.

Ne-

Neque Te celare patior, magnum consensum esse oculis cum renibus, & cum sint hi duo liquores valdè diuretici, ægrotantibus ex oculis etiam internè, observata salubris victus ratione, cum felici eventu propinquantur, in quos ad augendam virtutem specificam instillavi unam vel alteram guttam spiritus urinæ patientis legitimè præparati. Non quid alii de me scribant, sed quod ego Tibi scribo, est mihi curæ; quia placere uni Clarissimo Dn. *Thomæ Bartholino*, omnes Philosophiæ calles quaquaversus emenso, erit semper mihi solatium ingens. Vale. Hafniæ XIV. Febr. 1669.

Perennis Cultor & Servus
Addictiss.

BURRHUS.

FIGURÆ,
EARUMQUE EXPLICATIO.

FIGURA I.

Penicillus ex filamentis Auri textilis.



FIG. II.

Acus five tubulus acuminatus ad
perforandos oculos.



FIG. III.

Instrumentum Naso applicandum
ne oculus perforandus aut scindendus
dimoveatur è loco destinato vulneri.



FIG.

FIG. IV.

Lanceola ad scindendos oculos oportuna citra læsionem nervi optici.



FIG. V.

Tubulus æneus claudendus cum ostiolo, per quem in gutta serena vapores Aquæ chelidonii inspersi vasculo æneo ~~galofacto~~ modice ad ignem adscendunt ad oculos.



I

FIG.


FIG. VI.

Perspicillum concavum perforatum in medio, ad defendendos secatos oculos ab Aeris injuria, ut discant recta via novi humores crySTALLINI evibrare radios suos.



FIG. VII.

Perspicillum bifidum cum globulis bifurcatis, necessarium ubi profundè vulneribus oculi incidendi, nam coer-
cet intra se orbitam eorum ne loco moveantur.



Epi-

*Epigramma de eodem Artificio**BURRHIANO de quo pag. 40.*

T Rajicitur solido pupilla exterrita ferro,
 Quà patet, & retinæ stringitur ora
 stylo:

Stringitur, & trini dextrâ pressante liquores
 In prope spectantis lumina pœne volant;

Hac aqueus gyrat sese, crySTALLINUS illac
 Vertitur, atqve aliò vitreus urget iter.

Orbita funebres tunicas, & flaccida luget
 Deliquia, æternis semisepulta malis.

Conclamata salus: nil spondet dextra Galeni,
 Et Delphi Hippocratis, re superante, jacent.

Phillyridis mundum Colophon, res digna stu-
 diorum idu mirasceant, & pore,

Sunt heic, sunt tantæ pharmaca nata spei:
 Restituit BURRHUS solem, lumenqve sepultum

Integra rursus luce micare docet.

Nectar in oppositum siphonibus urget hiatum,
 Atqve oculi hoc solo nectare vita redit:

Impletur bulbus, coit, & cum septima Phœbi
 Lux oritur, pleno lumine lumen adest;

Exhaustum doluisse neges, nisi contra cicatrix,
 Quæ tandem amisso nomine tota perit.

Res

Res fastis celebranda novis: celebratior illa:
 Noctem iterum, atqve iterum restituisse
 jubar:

Visa cano: pupilla iterum divisa coivit,
 Et nova crux oculo, lux nova facta fuit.
 Hoc est octavum terris ostendere mirum,
 Bis demptis oculis bis stabilisse diem.

OLAUS BORRICHIVS.

Ad Danos

Epigramma

FR. JOS. BURRHI.

Pax bellumq; docent Danos gentem esse Deorum,
 Quam cingunt lauru Mars & Apollo sua.
 Tu FRIDERICE caput ternis redimite coronis,
 Hanc regis Imperii proximus arte Jovi.

FINIS.


HAENAE,

Literis MATTHAE. GODICCHENII.

the
mills

and
the
mills

71





DESMOND SHAW CAMBRIDGE 1994

